

Mintgin duai reducir ses consum d'energia per 30%

(rtr) Entras la strategia d'energia 2050 da la confederaziun pajan las chasadas 20 fin 30% dapli per l'energia. Quai tenor calculaziuns dal cussegl federal. Ils pretschs creschissan era sch'ins construiss novas ovras atomaras, ha ditg la ministra d'energia *Doris Leuthard*. L'auzament dals pretschs declera Leuthard cun las investiziuns da radund 30 milliardas francs en energias regenerablas. La regenza federala vul augmentar la produenziun da l'energia idraulica sin almain 37 uras da terawatt fin il 2035.

Mesiras per sortir da l'energia atomara

Il cussegl federal ha preschentà l'emprim pachet da mesiras per sortir da l'energia atomara. Cun las mesiras vul il cussegl federal tranter auter sbassar il consum d'energia per persuna per 35% fin il 2035. Quai duai capitar en emprima lingua cun sanaziuns energeticas.

Plinavant vul la regenza federala augmentar la produenziun da l'energia idraulica sin almain 37 uras da terawatt e l'energia regenerabla duai prestar fin il 2035 bunamain 12 uras da terawatt.

Davart ina refurma da taglia ecologica n'ha il cussegl federal anc betg decidì. Il departament da finanzas vul preschentar sias propostas la stad proxima.

WWF: Cussegl federal sto dublegiar ses tempo

Per il WWF vegnan ils puncts centralis per realisar la midada d'energia memia tard. L'organisaziun pretenda che las mesiras stoppian gia purtar l'effect maximal il 2035 e betg pir il 2050. Per ina dretga midada d'energia stoppia il cussegl federal dublegiar ses tempo. Quai ha ditg il schef da WWF.

La Fundaziun svizra d'energia ensemen cun l'allianza cunter novas ovras atomaras beneventan la direcziun da la nova politica d'energia. Ellas pretendan dentant termins concrets cura che las ovras atomaras vegnan tschentadas giu.

Pbd beneventa refurma da taglia ecologica

La pcd vesa schanzas per il pajais cun la nova strategia d'energia. Quai scriva il president *Christophe Darbellay*. La pbd beneventa l'idea d'ina refurma da taglia ecologica. Cun quella possian ins contribuir per cuntanscher las finamiras da la strategia d'energia ed ils Verds èn d'accord cun la direcziun dal cussegl federal, crititgeschan dentant che las mesiras na sajan betg sufficientas.



Cussegliaera federala Doris Leuthard ha preschentà la strategia d'energia da la confederaziun per l'onn 2050.